



## Publicaziuns dalla vischnaunca, jamna 41

### Cussegl da vischnaunca

Il cussegl da vischnaunca seraduna **venderdis, ils 16 d'october 2020, allas 20.15** en halla da tennis dil Center da sport e cultura.

#### Tractandas:

1. Protocol 28-2017/2020
2. Senda Cuolm da Vi – Stgeinas (Val Segnas): Project e credit (messadi nr. 49-2017/2020)
3. Avertura Val Segnas – Val Sogn Placi: Project e credit (messadi nr. 50-2017/2020)
4. Ura da damondas (conform ad art. 44 dil regulativ da fatschentas)

*Il president dil cussegl da vischnaunca*

---

### Premi Desertina

A caschun da sia davosa seduta ha la suprastonza communal en concordanza cun la cumissiun «Premi Desertina» decidì da spustar la surdada dil Premi Desertina sin igl onn 2022, quei muort las mesiras da higiena e distanza en connex cul coronavirus.

Nus engraziein a tuts per lur capientscha.  
*Suprastonza communal*

---

### Controlla da habitonts

#### Mortori

*Christina Maissen-Durschei*, naschida ils 25 da fenadur 1918, morta ils 29 da settember 2020.

*Martin Casanova-Jacomet*, naschius ils 2 d'avrel 1933, morts ils 3 d'october 2020.

---

### Taxa da cumpensaziun da pumpiers 2020

L'obligaziun da far pumpiers entscheiva all'entschatta digl onn ch'ins cumplenescha il 21avel onn da naschientscha e finescha alla fin digl onn ch'ins ha cumplenu il 45avel onn da naschientscha. Tgi che presta buca survetsch activ ha da pagar ina taxa da cumpensaziun.

Tenor art. 15 dalla lescha da pumpiers dalla vischnaunca da Mustér ein student(a)s ed emprendist(a)s entochen 25 onns deliberai dalla taxa da cumpensaziun. Sur 25 onns ei l'entira taxa debitada. Termin da tagl ei ils 30 da settember. Ei dat negins quens pro rata.

Nus fagein attents **student(a)s ed emprendist(a)s sur 21 onns** d'inoltrar a scret ina confirmaziun actuala dalla scola ni digl emprendissadi. Il mussament ei da tarmetter entochen sil pli tard mesjamna, **ils 14 d'october 2020** all'administraziun communal, caum postal 57, 7180 Disentis/Mustér ni per e-mail ([rgenelin@disentis.ch](mailto:rgenelin@disentis.ch)). Mo cun ina confirmaziun a scret sa la deliberaziun vegnir risguardada.

Gia ordavon grond engraziament per las breigias.  
*Administraziun communal*

---



## Rimnada da pupi

### Venderdis, ils 9-10-2020!

Preziadas convischinas, preziai convischins. La rimnada da pupi digl october ha liug sco usitau.

**Adatg!** Ei vegn mo rimnau: gasettas, illustradas, catalogs, cudischs e prospects stampai. Il pupi sto vegnir deponius sper via (sche pusseivel in di avon). Igl ei impurtont da ligiar bein il pupi e da buca far memia gronds pacs. Engraziel. Nus rimnein buca cartun. Quel sa vegnir deponius a Raveras igl entir onn ora e quei las mesjamnas (16.00–17.30) e sondas (10.00–12.00) e buca durant la rimnada. Bien engraziament per Vies agid e sustegn!

*Nossa Scola populara Mustér, Ch. Berger*

---

## Colonna d'agid Mustér

### Cuors da reiver per affons

Gia dapi biars onns organisescha la Colonna d'agid Mustér mintga stad cuors da reiver per affons. Per dar era igl atun la pusseivladad da trenar da reiver vegn organisau durant otg mesjamnas sera in cuors da reiver per affons dallas annadas 2012 entochen 2008.

Liug: Halla da reiver el Center da sport e cultura, Mustér  
Entschatta: mesjamna, ils 28-10-2020 entochen mezz december 2020  
Annadas 2012 entochen 2008  
17.30–19.00  
Menaders: Commembers dalla Colonna d'agid Mustér cun brevet  
Giuventetgna e sport  
Annunzias: Entochen gliendisdis, ils 26-10-2020 alla Colonna d'agid Mustér,  
Otmar Venzin tel. 079 381 25 52.

Segirada ei caussa da mintga participont/a.  
*Colonna d'agid Mustér*

---

## Café rumantsch a Mustér

Nus selegrein d'envidar al proxim Café rumantsch, **venderdis, ils 9 d'october 2020**, allas 20.00 ella Cafeteria dil Center da sport e cultura a Mustér. Nies hosp ei Gion Tenner che raqueta da siu project sursassiala.ch e da sia lavur pigl archiv communal. Indigens, Zweitheimische, Zugezogene und Gäste treffen sich regelmässig zum rätoromanischen Austausch. La sentupada ha liug regularmein jeden zweiten Freitag im Monat.

Nus selegrein sin Vus.  
*Gion Hosang, menader Lia Rumantscha*

---